



mr. hfz. muhamed čajlaković

mubarek-mjesec ramazan

Hvala Allahu, Gospodaru svjetova. Allahovi blagoslovi, mir i spas na Njegovog posljednjeg poslanika i vjerovjesnika Muhammeda, a.s., njegovu porodicu, sve njegove ashabe i na one koji ga slijede do Sudnjeg dana!

Braćo, ponovo nam dolazi dragi gost, mubarek-mjesec ramazan, mjesec bogobožnosti, dobročinstva i zahvalnosti Allahu, dž.š. To je mjesec početka objave Kur'ana i mjesec u kojem je najodabranija noć: Lejletu-l-kadr.

Post u mjesecu ramazanu stroga je dužnost, od zore pa do zalaska sunca, za svakog punoljetnog, zdravog i pametnog muslimana i muslimanku koji znaju da je taj post obavezan. Nevjernik je ko to porekne, a grešnik je ko ga, bez opravdanog razloga, ne obavlja.¹

Obaveznost posta u mjesecu ramazanu propisana je u Kur'anu i sunnetu. Svi islamski učenjaci slažu se da je post jedna od pet islamskih dužnosti.²

Allah, dž.š., kaže: *O vjernici! Propisuje vam se post, kao što je propisan onima prije vas, da biste se grijeha klonili.* (El-Bekara, 183)

Zatim, Allah, dž.š., kaže da je taj post islamska obaveza u mjesecu ramazanu:

U mjesecu ramazanu počelo je objavljivanje Kur'ana, koji je putokaz ljudima i jasan dokaz Pravog puta i razlikovanje dobra od zla. Ko od vas u tom mjesecu bude kod kuće, neka ga u postu provede, a ko se razboli ili se na putu zadesi, neka isti broj

dana naposti, Allah želi da vam olakša, a ne da poteškoće imate, da određeni broj dana ispunite, i da Allaha veličate zato što vam je ukazao na Pravi put, i da zahvalni budete. (El-Bekara, 185)

Muhammed, a.s., kaže: “Islam je sagrađen na pet stubova: svjedočenju da nema boga osim Allaha i da je Muhammed, a.s., Allahov poslanik, obavljanju namaza, davanju zekata, postu mjeseca ramazana i hodočašću Kabe.”³

Post se sastoji iz namjere i suzdržavanja:

1. namjera (nijet) u određeno vrijeme (od početka noći uoči dana koji će se postiti, a najdalje do podneva dana koji se posti) za svaki dan;
2. suzdržavanje od jela, pića i drugih tjelesnih prohtjeva od zore do zalaska sunca.⁴

Korist i nagrada za post u mjesecu ramazanu

Post gradi i jača mnoge dobre ljudske osobine kao što su: odlučnost, strpljivost i odricanje. Ovim ibadetom čovjek jača svoju duhovnu komponentu, koja uvijek treba biti ispred tjelesne.

Post, također, u čovjeku izaziva osjećaj samilosti i bratstva, što ga navodi da pomaže drugima koji su žedni i gladni. Tako se putem posta jačaju društvene veze.⁵

Post je veoma koristan za ljudsko zdravlje, jer ublažava ili liječi neka oboljenja.

Nagrada za ispravan post jeste neograničena. Ispravnim postom postiže se Allahovo zadovoljstvo (rizāluk). Postač će ući u Džennet na posebna vrata koja se zovu Rejjān.

Muhammed, a.s., kaže: “Džennet ima jedna vrata po imenu Rejjān, kroz koja će na Sudnjem danu ulaziti samo oni koji su postili...”⁶

Muhammed, a.s., također, kaže: “Post je štit, pa neka se postač sustegne od tjelesnih prohtjeva i ružnih djela. Ako ga neko napadne, ili počne grditi, neka mu dva puta kaže: ‘Ja postim!’ Tako mi onoga u Čijoj je ruci moja duša, zadah iz usta postača sigurno je kod Allaha bolji od mirisa mošusa.” Allah, dž.š., kaže: *Postač ostavlja svoje jelo, piće i požudu radi Mene. Post je moj, i Ja za njega posebno nagrađujem, a za svako dobro djelo ima deseterostruka nagrada.*⁷

Post se ne smije svesti samo na puko gladovanje, trpljenje žeđi i sustezanje od prohtjeva tijela. Nije bez razloga Muhammed, a.s., rekao:

“Ko ne napusti lažan govor i postupanje po njemu, pred Allahom mu ništa ne znači što ostavlja svoje jelo i svoje piće.”⁸

Postać se veseli iftaru i veselit će se svome postu pri susretu sa Allahom, dž.š.⁹

Bilješke:

¹ Tuhmāz, Abdulhamīd Mahmūd, *Hanefijski fikh*, Knjiga 1, prijevod: Zuhdija Hasanović..., izdavač Haris Grabus, Sarajevo, 1423. h.g. / 2002., str. 482-483.

² Sejjid, Sabik, *Fikh al-Sunnah*, prijevod: Fahrudin Smajilović..., Bookline d.o.o., knjiga 2, Sarajevo, 2008., str. 155.

³ ‘Abdullatīf az-Zubaydī, *Buharijina zbirka hadisa (sažetak)*, prijevod s arapskog Mehmedalija Hadžić, El-Kalem, Sarajevo, 1425. h.g. / 2004., str. 17.

⁴ Zaydān, ‘Abd al-Karīm, *Al-Mufasssal*, Al-Resalah, Bejrut, tom I, str. 43-48.

⁵ Al-Zuhaylī, Wahbah, *Al-Fiqh al-Islāmiyyu wa Adillatuhū*, treće izdanje, Dār al-Fikr, Damask, tom II, 1989., str. 568.

⁶ ‘Abdullatīf az-Zubaydī, nav. dj., str. 395.

⁷ ‘Abdullatīf az-Zubaydī, nav. dj., str. 395.

⁸ ‘Abdullatīf az-Zubaydī, nav. dj., str. 397.

⁹ ‘Abdullatīf az-Zubaydī, nav. dj., str. 397.